

Na osnovu člana 21. stav 3. Zakona o raseljenim licima i povratnicima u Federaciji Bosne i Hercegovine i izbjeglicama iz Bosne i Hercegovine („Službene novine FBiH“, broj: 15/05), poštujući obaveze implementacije Aneksa VII Općeg okvirnog sporazuma za mir u Bosni i Hercegovini, a u cilju stvaranja uslova za održivi povratak, Federalno ministarstvo raseljenih osoba i izbjeglica raspisuje

JAVNI POZIV

**za finansiranje i sufinansiranje infrastrukturnih i drugih projekata od značaja za širu društvenu zajednicu u mjestima povratka na prostoru Bosne i Hercegovine
za period 2026. - 2028. godina**

I

Predmet Javnog poziva

Predmet ovog Javnog poziva je finansiranje i sufinansiranje infrastrukturnih i drugih projekata od značaja za širu društvenu zajednicu u mjestima povratka na prostoru Bosne i Hercegovine u periodu od tri godine, od 2026. do 2028. godine, za sljedeće programe:

1. **putne infrastrukture;** (putevi, mostovi, potporni i zaštitni zidovi, kružni tokovi, parkirališta, pješačke i biciklističke staze, sanacija klizišta i sprječavanje erozije, hidrotehnički objekti itd.)
2. **komunalne infrastrukture;** (vodovod i kanalizacija, javna rasvjeta, energetske i komunikacijske mreže, plinske i niskonaponske mreže, itd.)
3. **objekata vjerskog i sakralnog karaktera;** (vjerski objekti, memorijalni kompleksi i spomen obilježja, prateći objekti, itd.)
4. **objekata obrazovnog, sportskog i kulturnog karaktera;** (predškolski, školski objekti, univerziteti, fakulteti, dječija igrališta i igraonice, sportske dvorane i igrališta, itd.)
5. **ostali objekti od značaja za širu društvenu zajednicu;** (domovi kulture, društveni domovi, biblioteke, zdravstveni objekti, muzeji i slični objekti društvene namjene, itd.)
6. **zajednički međuentitetski i međuopćinski/međugradski projekti i zajednički projekti sa vladinim i nevladinim organizacijama;** (podrška obnove i izgradnje putne infrastrukture u dijelovima između entiteta, pomoći u obnovi i opremanju objekata obrazovnog, sportskog i kulturnog karaktera, te ostalih projekata od značaja za širu društvenu zajednicu, kao i podrška organizovanja raznih sportskih, kulturnih i drugih manifestacija, i slično).
7. **nabavka nekretnina (zemljišta i objekata) u svrhu projekata memorijalizacije, zaštite kulturnih dobara i objekata od značaja,** na područjima gdje je presudama međunarodnih krivičnih sudova utvrđeno počinjenje teških ratnih zločina u periodu 1992.-1995. godina (samo za aplikante pod brojem 4. iz tačke III ovog javnog poziva).

II

Opći cilj Javnog poziva

Opći cilj ovog Javnog poziva je podrška realizaciji prioriternih infrastrukturnih projekata i drugih projekata od značaja na lokalnom i regionalnom nivou, koji imaju za cilj da doprinesu održivom povratku i razvoju zajednice u smislu poboljšanja lokalne infrastrukture i kvaliteta života u povratničkim sredinama.

III

Pravo učešća

Pravo učešća na Javnom pozivu imaju:

1. mjesne zajednice;
2. općine/opštine/gradovi kao jedinice lokalne samouprave;

3. kantonalne institucije i organi,
4. institucije memorijalizacije i vjerske zajednice,
5. nevladine organizacije i sportske organizacije čije su programske aktivnosti usmjerene na poboljšanje uslova održivog povratka.

Prednost pri odabiru projekata će imati projekti od kojih će direktnu korist imati povratnici i raseljena lica odnosno projekti koji imaju jasan cilj poboljšanja kvaliteta života tih kategorija društva.

IV

Finansijska sredstva

Maksimalna vrijednost (su)finansiranja jednog projekta od strane Ministarstva iznosi do 500.000,00 KM. Maksimalna vrijednost finansiranja jednog projekata od strane Ministarstva iznosi do 100.000,00 KM ako je projekat apliciran od strane nevladinih i sportskih organizacija.

Po projektima „Kapitalni transferi drugim nivoima vlasti i fondovima-Podrška implementaciji održivom povratku, izbjeglih i prognanih lica sa područja Regije Srebrenica“, Ministarstvo može podržati (su)finansiranje projekata do iznosa od 1.500.000,00 KM po projektu.

Maksimalna vrijednost finansiranja po svim projektima za područje jedne općine/grada iznosi do 3.000.000,00 KM na godišnjem nivou.

Finasijska sredstva za realizaciju ovog javnog poziva se izdvajaju u Budžetu Federacije Bosne i Hercegovine na godišnjem nivou i njihov iznos može biti promjenjiv u skladu sa visinom budžetskih sredstava raspoređenih Federalnom ministarstvu raseljenih osoba i izbjeglica.

V

Broj prijavljenih projekata

Jedan podnosilac može dostaviti više aplikacija u okviru ovog javnog poziva. U tom slučaju se moraju predati odvojene aplikacione forme i dokumentacija uz svaku aplikaciju.

Za svaki projekat se podnosi posebna aplikacija.

Maksimalni broj aplikacija za područje jedne općine/grada iznosi:

- 15 zahtjeva za projekte iz grupe 1. programa,
- 10 zahtjeva za projekte iz grupe 2. - 5. programa,
- 10 zahtjeva za projekte iz grupe 6. programa.
- 2 zahtjeva za projekte iz grupe 7. programa.

Projekti koji budu uvršteni na konačnu rang listu potencijalnih korisnika mogu mijenjati redoslijed na rang listi u skladu sa definisanim prioritetima aplikanta, ukoliko je isti aplicirao za više projekata, a posebno se može uvažiti preporuka kantonalne institucije nadležne za pitanja raseljenih lica i povratnika.

VI

Opći kriteriji

Prijava na javni poziv obavezno treba da sadrži sljedeće dokumente:

1. Čitko popunjenu, potpisanu i ovjerenu prijavu na javni poziv na obrascu koji je dostupan na internet stranici Ministarstva www.fmroi.gov.ba ili se može preuzeti lično u prostorijama Ministarstva na adresi Hamdije Čemerlića broj 2. Sarajevo;
2. Akt o registraciji ako prijavu podnose nevladine i sportske organizacije;
3. Uvjerenje o poreskoj registraciji – ID/JIB broj;
4. Ugovor sa bankom ili potvrda banke o otvorenom računu;

5. Preporuka realizacije projekta izdata od strane lokalne zajednice (općine/grada) prema registrovanom sjedištu aplikanta, a kod vjerskih zajednica, preporuka se izdaje od višeg nivoa vjerske zajednice (osim za projekte iz programa 7.).

6. Predračun radova koji odgovara namjeni i visini iznosa za koji se aplicira (osim za projekte iz oblasti podrške organiziranja raznih sportskih, kulturnih i drugih manifestacija i projekte nevladinih organizacija koji se ne odnose na radove).

Napomene:

1. Uslov za zaključenje ugovora u okviru programa 7. između Ministarstva i aplikanta jeste prilaganje ugovora/predugovora o kupoprodaji zemljišta koji je notarski obrađen ili ugovora o davanju na korištenje zemljišta, ili elaborata sa procjenom od licenciranog sudskog vještaka građevinske ili ekonomske struke registrovanog pri Federalnom ministarstvu prostornog uređenja ili Ministarstvu za prostorno uređenje, građevinarstvo i ekologiju entiteta Republika Srpske.
2. Mjesne zajednice koje nemaju status pravnog lica, te nemaju svoj ID/JIB broj, niti otvoren transakcijski račun, mogu dostaviti saglasnost jedinice lokalne samouprave o preuzimanju aplikacije za podneseni zahtjev u slučaju odobravanja (su)finansiranja po ovom javnom pozivu. Saglasnost sa potrebnom dokumentacijom se dostavlja odvojeno za svaki pojedini zahtjev. Obrazac saglasnosti se nalazi u prilogu javnog poziva.

Sva dokumentacija uz prijavni obrazac mora biti u originalu ili ovjerenoj kopiji (od strane općine ili notara) ne starijoj od 30 dana.

Posebni kriteriji

Dokazi iz posebnih kriterija nisu obavezni, ali će se na osnovu istih izvršiti dodatno vrednovanje aplikacija:

1. Dokaz o uposlenju povratnika iz populacije manjinskih povratnika u skladu sa Aneksom VII (član 1. tačka 3. (d)), zaposlenim po Javnom pozivu ovog Ministarstva za podršku zapošljavanju povratnika u organima javne uprave, javnim ustanovama i javnim preduzećima, na prostoru entiteta Republika Srpska, Brčko Distrikta Bosne i Hercegovine i entiteta Federacija Bosne i Hercegovine za područja srednje razvijenih, nerazvijenih i izrazito nerazvijenih općina i gradova, broj: 03-32-3-42-1/25 od 25.03.2025.godine (dokaz: ugovor o radu ili rješenje o postavljenju).
2. Izjava o spremnosti sufinansiranja projekta sa dokazima – vlastito sufinansiranje ili nefinansijski doprinos iz ostalih izvora prihoda za sufinansiranje projekta.
Dokazi koji se priznaju: izjava aplikanta, izvod iz banke sa dokazom u visini sredstava za sufinansiranje projekta, potpisani ugovori/memorandumi/sporazumi o saradnji sa partnerima koji učestvuju u realizaciji projekta, pismo podrške ili odluka o dodjeli sredstava i sl., kao dokaz o osiguranju sredstava iz drugih izvora. Izjava mora biti ovjerena i potpisana i u formi koju je propisalo Ministarstvo, a koja se može preuzeti na internet stranici Ministarstva.
3. Projektno-tehnička dokumentacija: idejni projekat, glavni projekat, urbanistička saglasnost, građevinska dozvola i ostala odobrenja potrebna za realizaciju projekta izdata od nadležnih organa. *(Nije obavezno dostavljati kompletnu printanu verziju projekta, može se dostaviti ovjerena fotokopija naslovne stranice projekta, a projekat se može dostaviti u elektronskom obliku)*
4. Projektni prijedlog sa jasno određenim ciljevima, sredstvima i očekivanim rezultatima.
5. Preporuka nadležnog organa za pitanja raseljenih lica, izbjeglica i povratnika na bilo kojem nivou vlasti.
6. Izjava/potvrda o broju povratnika kojima će projekat koristiti.

Napomena: Obrazac izjave o spremnosti sufinansiranja projekta se nalazi u prilogu javnog poziva.

Sva dokumentacija kojom se dokazuju posebni kriteriji mora biti u originalu ili ovjerenoj kopiji (od strane općine ili notara) ne starijoj od 30 dana.

VII

Način izbora projekata

Izbor potencijalnih projekata po osnovu ovog javnog poziva će vršiti posebna komisija koju će imenovati federalni ministar raseljenih osoba i izbjeglica.

Komisija će razmatrati prijave u skladu sa procedurama za izbor potencijalnih projekata, te u skladu sa odredbama ovog Javnog poziva.

Komisija zadržava pravo provjere tačnosti podataka iz aplikacije na javni poziv, te u slučaju da utvrdi da podaci nisu tačni može predmetnu aplikaciju odbaciti kao neurednu.

VIII

Objavljivanje rang listi potencijalnih korisnika pomoći

Preliminarna i konačna rang lista po ovom javnom pozivu će biti objavljene na internet stranici Federalnog ministarstva raseljenih osoba i izbjeglica www.fmroi.gov.ba, također i obavijest o donošenju odluka.

IX

Obrada ličnih podataka podnosioca prijava

Podnošenjem prijave na ovaj javni poziv, podnosilac daje saglasnost Federalnom ministarstvu raseljenih osoba i izbjeglica za obradu svojih ličnih podataka, u skladu sa Zakonom o zaštiti ličnih podataka. Lični podaci se obrađuju isključivo radi provjere ispunjenosti uslova javnog poziva, izrade ugovora, realizacije dodjele pomoći, vođenja evidencije korisnika i izvršenja plaćanja. Podaci se mogu dostaviti trećim stranama samo u okviru zakonskih obaveza. Radi transparentnosti postupka i ostvarivanja prava na žalbu/prigovor po javnom pozivu, minimalno neophodni lični podaci korisnika bit će objavljeni na službenoj internet stranici Ministarstva.

Podnosilac ima pravo da zatraži pristup, ispravku, brisanje ili ograničenje obrade svojih podataka, u skladu sa zakonom.

X

Dostavljanje prijava na javni poziv

Podnosilac prijave obavezno popunjava sve rubrike prijavnog obrasca, označava ponuđene opcije upita i odgovara za vjerodostojnost svih unesenih podataka. Samo potpuno uneseni podaci će se koristiti prilikom vrednovanja prijave.

Neotpune, neuredne i neblagovremene prijave neće biti razmatrane.

Obrazac prijave i obrasci izjava su dostupni na internet stranici Ministarstva www.fmroi.gov.ba, ili se može preuzeti lično u prostorijama Ministarstva na adresi Hamdije Čemerlića broj 2., Sarajevo.

Dostavljanje prijava na javni poziv se vrši **lično ili preporučenom poštom na adresu:**

**Federalno ministarstvo raseljenih osoba i izbjeglica
Hamdije Čemerlića broj 2.
71000 Sarajevo**

sa naznakom: *Prijava na „Javni poziv za finansiranje i sufinansiranje infrastrukturnih i drugih projekata od značaja za širu društvenu zajednicu u mjestima povratka na prostoru Bosne i Hercegovine za period 2026. - 2028. godina“.*

Na poledini koverta obavezno navesti naziv podnosioca prijave, tačnu adresu i broj telefona.

Rok za dostavljanje prijava je 05.12.2025. godine.

Dodatne informacije mogu se dobiti putem telefona: 033/294-134 ili putem e-maila: odrzivi@fmroi.gov.ba

Napomena:

Prijave/molbe/zahtjevi/projekti potencijalnih korisnika sa područja Federacije BiH i Republike Srpske koji se nalaze na utvrđenim rang listama potencijalnih korisnika pomoći proisteklih iz prethodnog Javnog poziva iz programa održivog povratka „Izgradnja i sanacija infrastrukturnih i drugih objekata od značaja za širu društvenu zajednicu u mjestima povratka na prostoru Bosne i Hercegovine za 2024. i 2025.“ se neće realizovati nakon objavljivanja konačne rang liste po ovom Javnom pozivu.

MINISTAR

Nerin Dizdar

Broj: 03-32-3-202/25

Sarajevo, 05.11.2025. godine

BOSNA I HERCEGOVINA
FEDERACIJA BOSNE I HERCEGOVINE



Federalno ministarstvo
raseljenih osoba i izbjeglica